

本朝分省人物考

人物考卷之一百八目錄

四川保寧府

蔣良輔

趙欽

韓義

何瀟

任彬

劉孔凱

李冕

唐仁

鮮弘

李實

任儀

雷應通

袁璋

附子襲

楊輔政

苟惠

苟溥

之草夕... 卷一百一十五

何光裕

趙炳然

王尊賢

順慶府

范循

王鉞

張永清

馮牧

楊純

魏必通

馬廷用

李陽春

江萬實

石天柱

孫仲玉

韓士英

馮馴

王翰臣

張芊

陳以勤

楊麗

王嗣文

李應和

陳于陞

向信

譙孟龍

王佩

補遺

王袞

王用禎

王德完

叙州府

郭廉

梁承宗

李從智

牟倫

黃仕儁

李永通

周洪謨

李本

吳道宏

侯旺

劉忠

周汝端

陳卿

楊僕

侯啓忠

李仕清

劉景宇

周惠

甘爲霖

駱頤

卞偉

蘇奎章

補遺

李人儀

劉信

重慶府

蹇義

劉元

康健

胡子昭

胡子義

伍善

蹇英

李實

江朝宗

劉岌

蔣雲漢

費廣

王愛義

附李典

劉春

朱光正

鄒智

楊孟瑛

陳瑞

劉福

詹奎

曹勅

姚學禮

戴錦

劉蒞

胡守約

王俊民

劉鶴年

張縉

熊萬變

任轍

劉啓宗

張佳胤

江淵

王應元

聶賢

李允

白勉

沈運

補遺

尹鉉

曾嶼

李恭懿

凌伯曾

本朝京省人物考卷之一百八

四川

保寧府
叙州府

順慶府
重慶府

蔣良輔

蔣良輔保寧府閬中人洪武三十三年任本府儒學教授學規嚴整課試有方勤於教迪造就生徒居多知府虞謙重之薦于朝陞給事中擢吉安知府

趙欽

趙欽洪武舉人任宿遷教諭考滿之京太祖欲授重秩對曰臣有過不應取生員米三升以待急客上笑曰孔子所謂束修非止此也因歎曰取米急客權

也爲臣不欺君忠也命吏部就祿侍養除新都學諭
造士有聲欽世家廣元

韓 義

韓義南部人貢士博學善詩時有行人巡茶至縣以
權稅爲民害義上書言本地無茶行人強權殃民縣
官被其拘留不得上請 帝嘉其能言除南甸令

何 瀟

何瀟巴州人州學自洪武乏科百餘年瀟以儒士登
孫賢榜後科第相續筮仕龍泉政教大敷肇修隄防
爲一方保障憂歸補贛榆縣值歲荒多方賑濟全活

尤衆

任彬

任彬蒼溪人景泰間由舉人授雲南石屏守俗雜夷漢立社學改州學選質美生員授以經義親督課業次年舉鄉試彬一人時有長官司吏目高秉權被頭目刁諒毒死彬檢勘刁諒潛送黃白金七百兩拒絕不受明正諒罪人服其廉

劉孔凱

劉孔凱閬中人由進士授太平令正風俗興學校有馴虎甘露之祥陞戶部郎中辭疾家居講學不輟著

夢覺稿詩文語錄

李冕

李冕普城人天順間進士成化中歷湖廣僉事征勦辰靖叛夷擒獲水寇有功陞福建副使持憲有聲尋陞陝西按察使嘗與周瑛講明聖賢之學學者稱崇岡先生有崇岡集

唐仁

唐仁字秉元號鳳山保寧南部人自少篤問學治春秋繼以詩薦秀鄉闈累奇於會試天順甲申始成進士觀政大理詳練律學正統初勅吏部遴選諸進士

之超卓者補官六科拜兵科給事中頃之丁內外艱服闋調官吏科以都給事中缺命掌科事尋遷左給事中每歲吏部選官仁預其事量才授官無不允當直登聞鼓有赴訴者得報遂發行無或少滯法司會諸大臣錄囚仁在列凡有疑獄必力爭不已代王奏守將徐都督不法上命按其事悉得其情元惡首服餘寃皆釋朝廷以邊將郡守不可輕授召廷臣各舉所知仁以指揮劉良知縣馬琛舉卒皆稱任立朝幾十載凡時政缺失靡不盡言扶正抑邪無所畏避

鮮弘

鮮弘闔中人任醫學正科天順間寇掠南部逼闔境
府檄弘率民兵禦之道遇賊奮擊死事聞俾孫義世
襲其官

李實

李實巴州人弘治進士授翰林檢討陞岐府長史動
有禮法守正不阿有中官欲侵旁郡葺稅實執不可
遂誣之下獄事白中官反坐改趙府以三品致仕

任儀

任儀閬中人進士選吉士授御史適權貴以內命建

佛會于興隆寺一御史乘馬過寺門爲宦者所辱儀
上疏劾之坐是外補歷選山西右叅政忤逆瑾再謫
西安府同知

雷應通

雷應通嘉川人正德間流賊衝百丈關知縣何溥提
兵拒敵應通父子七人踴躍倡衆誓以死戰爲賊所
執各慷慨就死

袁璋

袁璋南江人正德間盜賊倡亂都御史林俊委令殺
賊璋奮不顧身所向有功其後兵盡矢竭爲賊所獲

男袁襲挺身救父連殺七賊被擒襲死三日兩目猶
睜視其父林公爲詩挽之榜其門曰父子忠節總制
彭澤嘉其節義勒石城隍廟祀於忠義祠

楊輔政

楊輔政通江南山巨族正德間督率兵衆追鄂藍賊
于羅江列坪鎮賊屢戰屢却輔政乘勝逐北孤軍遠
入援兵不前力戰皆沒都御史林俊聞于朝立忠烈
坊以旌之

苟惠

苟惠通江人剛烈有膽略藍賊起惠率衆合羅猶軍

爲犄角以擊之賊破走龍潭惠從間道衝殺賊溺死
水中水爲之不流復與戰于松樹柹殺傷甚衆會日
暮賊伏兵出惠力屈而死

苟溥

苟溥通江人惠族弟膂力過人藍鄙陷城縱火煙焰
蔽天溥帥銳卒五百人合兵進擊賊敗于三花頂兵
聲大震尋敗賊于龍潭屍骸枕藉山谷後數百賊潛
入溥家溥短兵接戰于門身被數十鎗父子兄弟同
時遇害者三十五人

何光裕

何光裕嘉靖進士由翰林諫用仇鸞廷杖卒 世宗
遺詔贈太常寺卿所著有石亭初集傳于世

趙炳然

趙炳然字子晦四川劍州人嘉靖乙未進士拜監察
御史按浙江正大惇篤風裁屹然核吏治糾官邪察
民隱部內不嚴而肅歲壬戌浙撫臺以事逮詔獄炳
然以兵部侍郎復來撫浙前撫院有攘寇功用日益
奢頗以此失士民心炳然既受代身持節儉以綏靖
民去諸浮淫蠹政者汰冗食定兵制減額餉立哨道
造喇唬兵船建羅木營先是浙兵未練調集客兵以

勦賊立功素已驕恣又不立營舍以安戢之往往寄寓僧寺或散處民間出入無程去爲奸盜甚則白晝攫金暴橫無已炳然深知其害乃建營分處各兵禁其出入有犯禁者卽按誅如律兵乃戢浙人感其德貌像營中祀之炳然立身居官以誠爲本天下識不識皆知爲正人端士云仕終兵部尚書贈太子太保謚恭襄賜祭葬如制

王尊賢

王尊賢閬中人性剛介博學能文嘉靖間貢至太學時上好方士多災異人莫敢言賢撰聖學要義中

和衍義上之及諫立 東宮忤權臣下獄已而 上
閱其書奇之謂輔臣曰布衣敢言當世事忠臣也釋
其獄授程番推官有異政致仕歸貧落如韋布時著
史學辯疑紫霄文集

順慶府

范循

范循南充人永樂初進士授御史陞青州僉事耿介質朴克持憲紀有古人風

王鉞

王鉞營山人永樂中以易中式隱居翠屏山不仕號竹壑老人言動不苟侍御方昇贈以詩曾向蟾宮折桂花歸來林下度年華于今兩鬢俱成雪萬竹森森暮景賒

張永清

張永清南充人景泰中進士選翰林庶吉士授禮部
主事擢知嚴州府爲政嚴明歲饑不待報請減稅額
闢沙渚沒豪右田以給貧民御史上其狀璽書褒美

馮牧

馮牧南充人景泰中進士任戶部主事擢知延安府
改邵武寬賦役雪冤疑建陽賊嘯聚直抵巢穴擒斬
賊首民賴以安陞湖廣叅政以親喪去任廬墓哀毀
養疾不出士論高之

楊純

楊純隣水人成化中進士任監察御史巡按貴州決

斷如流任滿百姓乞留一年 上許之民謠曰隣水
楊但願年年巡貴陽貪污畏法軍民安康陞陝西副
使去之日黎獠遮道攀留

魏必通

魏必通儀隴人成化中父成醫學訓科賊犯境成率
兵禦之被虜必通入賊營以身代父賊乃釋成而留
必通抗言不屈被殺邑人皆恤其孝

馬廷用

馬廷用字良佐西充縣人丘濬爲祭酒時季試諸生
以廷用魁太學名遂太振中成化戊戌進士改翰林

院庶吉士授編修丁未同考會試陞侍讀充經筵官
乙卯主考順天鄉試預修大明會典陞南京翰林
院侍讀學士南禮部右侍郎致仕尋卒賜祭葬如例
贈南京禮部尚書廷用敦朴樂易而所存鯁介臨事
能斷在南京嘗攝戶部會江北大饑流民渡江就食
者相屬獨持議發廩不俟奏請全活甚衆外守備官
與太常議禮不合判數語立決學邃于易喜爲詩文
亦華贍又居散地勇於求退士論多之子金爲布政
使龠爲知府

李陽春

李陽春渠縣人弘治中進士任行人奉使名藩餽遺
一無所受居諫議彈劾不避權要以太常少卿致仕
歸恂恂如書生狀鄉人敬服

江萬實

江萬實大竹人正德初進士任監察御史巡按江西
抗疏言事動關國體時討寧庶人及平華林巨寇咸
與有功時稱名御史

石天柱

石天柱岳池人正德戊辰進士歷都給事中立朝敢
言乙亥武宗北巡力請回鑾戊寅駕南欲幸宣

府天柱刺血書疏以進遂止兵部尚書彭澤被誣當
刑天柱陳澤征伐功忤旨外調 世宗御極詔復前
職尋陞大理寺丞卒于官所著有秀峰集及奏稿

孫仲玉

孫仲玉南充邑民正德癸酉流賊侵縣仲玉與衆守
李灘爲賊所獲令探水仲玉示不可渡且呼衆固守
之賊不得渡斬仲玉遂去總制彭公大書忠義以表
之御史周雍曰使當時衆惜仲玉仲玉惜其身害未
可知也是蓋聞紀將軍之風而興起者乎

韓士英

韓士燧南充人正德進士授主事權稅江西時宸濠不軌士英持正不與通及守約陽弭盜賑饑屢有異政歷都御史巡撫鳳陽晉大司徒改司馬滌蠹減租選將練兵卓然有聲于時

馮馴

馮馴岳池人正德中進士授戶部主事會乾清宮災疏弭變七事言甚懇切出守興化除二虎三彪政治肅然謠曰馮太守來何遲書吏瘠百姓肥銓部考最榜天下第一官至江西布政使

王翰臣

王翰臣渠人正德間進士居父喪一遵朱子家禮監
司賻以金辭不受妻李氏卒終身不娶事繼母以孝
聞授主事歷鹽運同知力祛宿弊官民便之卒於官
囊無餘物人服其廉介

張 芊

張芊正德中進士爲郎中權稅浙江以廉名擢漢中
知府持法公平不逐時好所至有遺愛芊順慶人

陳以勤

陳以勤字逸甫號松谷一號青居山人其先世自閩
中來居南充之水西里母姪時夢有星如月光燭庭

階俄有神降授以研寤而生幼穎異不好弄伯父器
之曰吾陳三世爲儒鬱而未鬯其在孺子乎益發憤
與季父相師友銳志經術年十八爲郡博士弟子才
名籍甚丁酉領鄉薦辛丑第進士選庶吉士癸卯授
翰林院檢討乙巳代制草充會典纂修官丁未分校
禮闈尋請告侍父歸己酉居母喪壬子服除是秋充
裕邸講讀官丙辰遷修撰戊午進司經局洗馬兼翰
林侍講初兩邸並建而位號未定羣小窺隙構釁
動搖百端密勸穆皇變變藩邸規左右戒屬垣多
方調護之一日分宜子屏人語曰稍聞殿下有感

志謂家大人何新鄭故爲諛語勤正色曰安得此言夫國本固默定久矣乃生而命名從元從土若曰首出九域君意也故事諸王講讀並用檢討今間一編修獨異他邸以示崇重相意也 殿下每講尊公社

稷臣安得此言分宜乃安侍 裕邸九年 穆皇嘗

手書忠貞二大字及啓發弘毅四字賜之庚申聞父

喪賜祭贖及綵幣路資琴瑟服除仍代制草甲子遷

侍讀學士掌院事總校永樂大典亡何遷太常寺卿

領國子祭酒事乙丑擢禮部右侍郎尋改左明年改

吏部左侍郎兼翰林院學士教麻吉士 穆皇登極

召見賜賚有加是時天下想望太平而勤以舊臣首
上謹始十事定志保位畏天法祖愛民崇儉攬權用
人接下聽言比于姚崇要說云丁卯遂 詔以宗伯
直文淵閣參機務總裁 世廟實錄同知經筵事會
大典成加太子太保直武英殿尋以大慶加少傅兼
太子太傅戊辰 神宗五齡正位東宮出遇輔臣于
馳道勞苦之勤仰見 睿姿退而額手曰宗社萬年
慶也時華亭徐公當國而新鄭用事兩家門客乘其
隙交章相攻朝士或左右袒勤獨中立無所附竟二
公去私議不及之嘗自言 朝廷置輔設參本爲協

心體國安事羯羗乃或專懷不受言或引嫌不盡言
皆非也故在政府若金石相宣墳篋共和及當大事
果決不疑正色昌言不爲首鼠兩端又言執政者虛
心潔已奉一人威福聽百司公議潔綱維蠲煩苛進
忠賢抑躁競慎守 祖宗憲令罷一切紛更恬然而

天下理矣自古賢豪功名蓋天下而無功名之心心
喜功名天下始多事勤相業雖未竟而其梗槩則定
于數語矣隆慶初法令畫一海宇救寧又以時政尚
恭默希所裁決而近侍多緣內降得橫恩於是疏言
勵精修政四事甚切至上心寤已有 詔令司禮

監設文書案視 先朝後竟罷之疏亦留中論者惜
焉庚午以從一品滿蒙羊酒鈔錠之賜廕一子中書
舍人而是時新鄭內江外相引重而中矛盾江陵因
構其間于是堅有歸志然猶上疏陳慎擢用酌久任
處臧吏廣用人練民兵重農穀六事其秋遂乞骸骨
上慰留甚溫疏四上始得請加太子太師吏部尚書
致仕 賜璽書嘉獎給驛歸遣行人護行有司給廩
役 陛辭之日 上目送之而諸縉紳祖道者車馬
填溢瞻望咨嗟立朝三十年歷館局卿貳以及宣麻
一務直已守義奉公履正上結 明主而下爲物情

所歸有問以應事者曰行其初心得失勿問以是想見其平生矣貌古氣清與人交表裏洞徹不設町畦而其中有介然不可溷者議論慎重不破的不發生平獨好古法書名繪彝器至其奉身粗糲之食澣濯之衣泊如也其學以倫紀爲大宗操修爲實地謂古人盛德大業自勤小物慎一介始故居恒不輕取予卽燕褻衣冠危坐見世儒聚談性命掩耳不願聽曰儒者于學譬食飲喪葛耳獨行不愧影獨寢不愧衾獨居不愧屋漏安事多言人有迂而笑之者曰作法于迂其弊猶通作法于通流污何極或又誦此不近

名乎曰夫無實而外自標幟者電光蜺采耳若實也
日月星辰麗天自古所爲垂簡編勒鼎彝皆是物也
奈何弗好爲文初宗馬遷後頗尚曾子固旣叅大政
不復修詞人業獨手錄古今名臣批患扶傾解紛應
變之蹟口誦心惟設身其地而懸車以後乃喜佛書
時與高僧遊葛巾羽氅婆娑小園中更不問戶外事
至聞端人耆碩進用色動眉端有不當未嘗不嘖蹙
也庚辰七十 上出尙方綺幣寶鏹命子于陞歸賜
且令兩臺使者存問海內艷之平生少疾歲覩齒耳
豪寸許面有嬰孺色偶以暑月瘴下遂不起往數夢

日星河漢卿雲鸞鶴幡幢狀殆從列宿間謫也卒之前日有大星自西南墜一郡皆驚益與母夫人夢徵合云

楊麗

楊麗南充人嘉靖中進士授戶部主事歷守楚雄府有惠政民立生祠以祀歸與諸弟怡怡一堂分財讓產人稱質行君子

王嗣文

王嗣文大竹人由歲貢仕至山東副使時齊藩事多不法嗣文抗直不阿力爲裁抑後皆畏憚無敢干紀

者

李應和

李應和大竹人由進士任給事中遷叅議廉介自守以德化民有侵官地若干畝者有司漁獵其利置不問應和清出還官計畝徵稅官民兩便人立碑頌德

陳于陞

陳于陞字元忠別號玉壘世爲順慶府南充縣人太傅以勤子也太傅爲檢討時生于京邸生時室中夢有仙音導從自天擁一人下已而生太傅異之生而穎慧讀書如夙習太傅不甚督篤志下惟有所綜緝

結誤輒如太傅旨太傅益喜曰是真類我辛酉年十七舉鄉試第四人戊辰舉禮部第三人對策高等尋改翰林院庶吉士時同館皆一時之選而太傅方爰立出從諸彥歸奉庭訓博綜考鏡銳意於文閣試每冠太傅常避不閱卷徐文貞笑謂太傅曰我安知爲公子衆實有目公何不學祁大夫庚午授編修尋充實錄纂修官時太傅意有所不可輒上書乞骸骨固請扶侍同還蜀中父子晝繻世侈爲盛事壬申秋復如京師會穆宗實錄成陞修撰旋以太夫人憂歸丁丑以世宗實錄成陞俸一級服闋以原官充口

講已卯以講幄叙勞再晉俸一級庚辰太傅公年七十矣上疏乞歸省特 詔有司存問賜于陞鏹幣乘傳歸省故事大臣里居滿八袞始存問而太傅以七十得之稱異數云太傅歸集里中耆舊如任太史瀚王恭節十餘輩爲高年會陞從太傅身行酒炙必極歡乃罷太傅雅愛嘉陵黛玉山構樓游焉乃集唐詩詠江樓者命童子歌以佐觴凡可娛太傅者無不先意承之類如此癸未仍補日講兼起居注甲申擢司經局洗馬乙酉主順天鄉試晉侍講學士丙戌秋太傅訃至京哀毀骨立 上仍賜鏹幣給驛所以贈卹

太傅有加巳丑 上召陞仍爲日講官俄遷詹事府
詹事掌翰林院事庚寅上疏請立 東宮辛卯擢禮
部右侍郎掌詹事府壬辰主考會試尋改吏部右侍
郎未幾轉左以原官教習庶吉士癸巳以三品滿考
上賜鈔錠羊酒廕一子入胄監復同諸臣固請 冊

立 皇儲出閣與有力焉巳又疏請 上勤朝講按

臣工如徃歲不報是秋擢禮部尚書兼翰林院學士
仍掌詹事府少從太傅習國家故實入詞林後更留
意通今之學國史家乘無不折衷而討其至謂寶錄
寶訓秘在金匱而會典職掌又泯而不屬野史諸家

更秕而不興苟不及此時修正史何以昭一代之盛
乃上疏請倣宋正史例開局纂修 詔允行甲午春
感疾乞歸 上慰留不許是年秋 詔簡閣臣 命
以原官兼東閣大學士入閣叅機務感 上拔擢首
上六事一曰接見大臣二曰採人才三曰勸獎外吏
四曰清查邊餉五曰儲養將才六曰選擇邊吏大意
謂今 至尊端拱忠良沉滯吏治惰窳國儲匱乏邊
隅多警武備未修失今不爲更始後將何極以 肅
皇帝之精明而末年貪黷成風夷戎交侵則倦勤之
故請亟修朝講召對之典以振綱紀決壅蔽召還斥

謫諸臣而後以賞罰隨其後人情重內輕外今後行
取宜及州守太守治行高者卽入爲列卿巡撫宜叅
用內外果賢則久任之歲入有限邊餉日增宜簡主
餉曹郎重其權使覆虛冒將帥國之爪牙平時宜令
公卿大夫各舉所知武舉外別立一途以收異才邊
吏宜擇人與地宜者銓註令習熟邊事以需邊道開
府之用縷縷幾萬言皆其素所籌畫而稽積者也

上皆嘉納允行乙未二月以西塞功進太子少保已
滿二品考晉太子太保賜資加優仍廕一子入監讀
書是冬言官同時被 旨落籍者二十餘人南北臺

省幾空獨上疏曲爲諸臣營救若謂諸臣建白各有
主者又或遠在留都或奉使外省平時往往抗直不
避桀而逐之是言亦罪不言亦罪天下且謂陛下
陰惡其言而名以不言斥之臣等亦何以自解言極
委婉意上或稍解竟寢不行然中外翕然誦之未
幾兩宮災同諸大臣直叩內殿問慰覲得面陳不
獲已上疏引咎自陳乞罷不許冬至有事南郊感寒
疾竟不起上聞震悼命宗伯諭祭賜賚加渥又諭
皇長子故閣臣于陛有講幄勞特致優賜尤曠典也
贈太保謚文憲生平端凝雅重外和內介被容接者

如坐春風而砥礪操持凜然不可奪自史局以至政
府謝絕餽遺門庭如水性澹素雖生富貴衣不御鮮
華飾不享兼味一切濃艷嗜好泊然無涉惟好哀聚
古今墳典閉戶伏讀爲詩文冠冕宏麗居然盛世之
音嘗著文樂軒記以見志而所注心者尤在經世之
學考究往代典制朝家令甲與夫名臣碩輔所規條
厝注者故首創正史之議先勒諸大志欲使六曹九
域之故披卷可得上備九重乙夜之覽下令當事者
有所據以應猝意頗深遠一參大政卽毅然以擔當
國事爲已任其矢謨効悃功在廟社者良多通籍

二十餘年與修寶錄者二總裁正史者一入侍日講者三分校禮闈者一典主文衡者二主上養之以爲舟楫鹽梅而海內仰之如清鑪大呂沒之日無賢不肖皆嘆息其賢始終完結毫無點垢可謂得全全昌者矣所著有萬卷樓集若干卷藏于家

向信

向信字秉誠四川岳池縣人少而穎異既長就學聲名燁燁出流輩上庚午舉鄉試辛未登進士選河南府推官法比吏事如素練然僚屬羨服之尤留心民務蒿縣有永通渠久涸不潤力爲濬之靈寶縣有沙

鹺地若干頃爲請蠲其租陝州臨黃河溢徙別道其
淖淤地善肥饒謂之退灘田地固無主名民爭訟之
積歲不決令取爲軍民牧馬場至今便之劇賊劉六
之亂分守新安縣城督令丞修戰具揚先聲明號令
羣寇惴於西犯城得以完收被虜婦女以百數令遣
寧家獲棄遺畜產亦數百總制彭幸菴上其功有銀
牌綵幣之賜甫滿初命薦剡七八上徵入爲浙江道
監察御史未幾以母喪去位嘉靖改元服闋北上值
新政初陳講學用賢六事詔嘉答之其他論列極多
信幹宇軒昂揚休山立未別色入朝人望而知爲向

御史也與人交有信義而和氣欵言無少長愛之居閒好讀書爲詩文有古意又善射儀臺中的巧嘖四座飲酒不多而懽洽竟席環居種竹因自號竹溪綽有晉人風味焉

譙孟龍

譙孟龍南充人進士歷官叅政先知南昌府廉潔方正時稱循良居鄉孝友閭里感化

王佩

王佩南充人由進士性剛毅不隨時俯仰歷湖廣副使獨持風裁不畏強禦及解歸飭名勵行鄉評推重

補遺

王衮

王衮字廷瞻四川廣安州人嘉靖二年進士由行人選湖廣道御史十年督理屯馬巡按湖廣以議大禮廷杖復職十五年陞河南副使疏請致仕

王用禎

王用禎字子周四川南充縣人嘉靖三十八年進士由東陽知縣選廣西道御史巡按廣東隆慶元年建言降蘄州判官陞承天府推官累陞惠州府知府疏請致仕

王德完

王德完號希泉四川廣安州人萬曆丙戌進士改翰林院庶吉士戊子授兵科給事壬辰陞禮科左本年陞戶科都甲午養病庚子補工科都建言爲民條議宮闈之事痛快激切落職里居二十年杜門養高唐申起太常寺少卿陞左僉都又陞戶部侍郎未幾而卒

叙州府

郭廉

郭廉富順人永樂初進士歷尚書疏諫北征詞甚剴切直聲聞于中外後歸鄉里有中貴至邑誅求太甚廉束帶見之既退中貴曰郭公在此遂去

梁承宗

梁承宗宜賓人永樂進士歷山東道監察御史秉公執法風裁凜然親老乞歸養詔許之

李從智

李從智宜賓人永樂中進士任大理寺評事讞獄無

寃陞知蘇州府廉能著聲睦鄉黨置義田以贍宗族
之貧者謝病歸屢徵不起

牟倫

牟倫宜賓人永樂中進士任監察御史直言抗疏百
折不回叙南衛軍每苦遠調奏免之立鄉社以作養
後學郡人咸敬慕焉

黃仕儁

黃仕儁字庭臣世爲富順人自幼穎敏絕人書一再
讀卽成誦甫弱冠於五經四書諸史悉通大義入邑
庠爲弟子員一時流輩皆師事之宣德戊午領四川

鄉薦第一壬戌登進士以儀觀文學選兵科右給事中
儁在言路知無不言然小心謹恪凡所論奏必委
曲開諭以俟 上裁未嘗以言事得罪三載秩滿復
膺 勅命陞本科左給事申久之陞太僕寺左少卿
先是馬多耗每歲民鬻子女以償仕儁往鳳陽等府
巡視孳生馬匹見軍民以車載小口賣以買馬者相
繼於道歸卽疏其可矜之狀 上爲盡蠲所負時北
虜寇邊 上命偕左都御史王翱經制其事王方以
風節望天下同列鮮當意者仕儁出謀發慮出人
表王深器之遂相與歡洽如平生還朝言天下大利

言前後章奏凡數十上多見采納丁丑 英宗正位
簡賢圖治進刑部右侍郎治獄平恕務得其情民有
奸其女者誣以強獄成法當死疑之請再鞫不一其
語具得誣狀會山東凶奉 勅賑濟得以便宜行事
處置有方全活甚衆一旦坐累貶廣西叅議逾三載
念母老遂以疾力辭 詔許之乃歸成都買田宅居
已而與儁同坐累者相繼登用故舊慙慙起弗從日
彌觴賦詩以爲樂于于如也天性至孝太淑人春秋
高不能行愛遊院落園圃間親扶或自負不以委人
及卒時年已七十禮七十不行喪而哀毀踰制每念

不及事其先君子終爲恨歲時感泣爲人溫恭樂易
不爲崖岸峭絕之行接人無賢愚貴賤皆有恩禮而
待親戚尤篤其自奉儉約雖貴食不兼味一裘十數
年不易至於周人之急則無少吝貧不能殮者爲買
棺居成都時隣婦有亾首飾者其舅姑責之切欲自
盡密爲置補成化甲午卒所著有詩文二十卷藏於
家素工草書筆力遒勁有鍾王家法鄉人得之者重
如珍璧

李永通

李永通長寧人正統中登王夔榜進士官至侍讀學

士經筵進講多啓沃文章羽翼六經治陳氏三禮著
爲書傳輔導 憲宗勲勞益懋

周洪謨

周洪謨字堯弼叙州府長寧縣人正統甲子領鄉試
第一明年復占一甲進士第二授翰林院編修建言
復提學憲臣以振作人才景泰壬申陞左春坊左贊
善仍兼編修丙子修寰宇志成陞侍講天順戊寅改
侍讀署南京翰林院事甲申 憲宗卽位召修 英
宗實錄進侍讀學士洪謨以文爲業然有志政務多
所建白在翰林卽勸 上勤經筵以講聖學謹內治

以敦政本復條陳十二事以進及蜀寇作與長寧隣境稔知其出沒設禦備之術甚悉遂見擒而地方晏然丁亥陞南京國子監祭酒上疏言會饌乃高皇帝成憲歷年遵行以致學規嚴肅生徒勤謹自景泰中因無柴薪暫且停止其後因循廢弛至今未復訪得南京抽分廠積有柴薪宜令議復詔下南京禮工二部計議洪謨又言監生丁憂多有詐冒預令申達咨呈著爲令監生患病一年之外不復監者放爲民又令監生畢姻者有司先聞于部以待回娶皆如洪謨所言冬十一月又奏言每年差監生六人解毛

襖淹滯虛曠以致年久不得出身乞免差爲便從之
六年七月又奏言本監紅板倉二十座係 孝慈高
皇后積糧惠養諸生妻室乞爲修理庶表著 高皇
后良法美意於億萬年也 詔從之自后建倉房易
蘆席覆以瓦七年改北監祭酒尋丁憂十一年補原
職整飭規矩表率生徒且言修祀事廣倉儲禁酷刑
減正稅攘虜撫夷六事 上悉嘉納之又奏准申明
洪武二十年學規二十八條備榜戒諭十二年七月
奏請加孔子封號且謂古者鳴球琴瑟堂上之樂笙
鏞祝敔堂下之樂而干羽舞兩階今舞羽居上而樂

器居下非古制也宜令典樂者改正上乃降制曰
尊崇孔子朝廷盛典籩豆佾舞俱如洪謨所奏增
之十四年擢禮部右侍郎尋轉左進本部尚書有言
書載璿璣玉衡蔡傳不得其制乞改造以備占候既
成有羊酒寶鈔之賜後烏思藏等處入貢其貢使數
踰舊制一歲中有至三四千人者賞賜糜費不可勝
計自長河西諸番皆冒以圖利上言此特無印符無
驗耳宜照依海外諸番例各給與符二十道入貢備
填貢使物數於上仍識以舊賜金印至關驗以防詐
僞詔從謨議其費始省丁未進太子少保時月當

食不食或以爲宜賀洪謨謂此陰盛之象其可賀耶
遂止嘗奉 命祭天壽山神見役夫運載相繼於道
知有所營建歸言月令云盛夏不可興土功又曰舉
大事則有殃今歲大旱未必不由於此且時方炎蒸
人易疾疫宜暫休息之不報及 孝宗卽位之元年
以老致仕旣歸老蜀中惓惓不忘 朝廷忠勤之心
至於終身乃已三年以疾卒年七十二謚文安平生
尤善著述凡經史稍有疑輒訂正之其爲文簡直不
爲奇險語而理致明白粲然可愛所著有疑辯錄三
卷與朱熹相矛盾辨春秋所書正月據戴良以爲建

寅實非建子好奇者喜之有南臯子集二十卷箒齋集五十卷又手製璿璣玉衡圖以木代之規制工巧識者服其精

李本

李本字立之富順縣人正統戊辰進士改翰林院庶吉士歷官檢討編修侍讀預修一統志英廟實錄久之陞南京太常寺少卿禮部侍郎遂陞尚書成化二十一年九月辛丑卒賜祭葬如例本性質直不爲詭異之行然慷慨尚義聞有義舉則欣然倡率爲之其文章平實類其爲人平生不拘小節至大閑則不

失云

吳道宏

吳道宏字文博宜賓縣人天順元年進士授南京太常寺博士上疏論東南事併劾大臣之不職者選授監察御史巡按荆襄等府時荆襄流民復聚爲患議者多欲驅逐道宏言流民樂彼沃土逐之復來不如因而撫集皆爲良民于是建議行都司衛府州縣以安集軍民而籍其流散者特陞大理寺右少卿撫治其地以憂去服闋改南京大理右少卿尋陞本寺卿弘治三年言者論其庸碌因自乞致仕十五年九月

卒賜祭葬如例

侯 旺

侯旺長寧人天順初鄉試居家時都夷猖獗攻圍城邑有謀遷避者旺移書鹽水壩官軍示以死守城賴以全後修城者掘古墓取磚石旺禁勿取爲息縣令其俗好訟慣以墜胎誣人旺下令告墜胎者抵罪俗因以變其志歸詩曰迂叟襟懷惟典籍兒孫事業在綱常正德間知縣婁懌立祠以祀

劉 忠

劉忠南溪人成化中進士歷戶部郎中正直不阿見

眉州萬公當國解印綬歸閉門著書絕迹公府縣尹
陳俊饋以輿皂曰吾可以此累桑梓之民乎謝不受
事母至孝子孫兄弟皆相繼登科

周汝端

周汝端長寧人成化間舉人洪謨長子授戶部司務
轉中府經歷逆瑾伏誅條上五事俱見嘉納秩滿陞
銅仁知府至則興學撫叛漢夷懷服陞河東運使進
階叅政謝病歸鄉與弟汝靖徜徉山水時人擬之二
蘇云

陳卿

陳卿宜賓人弘治中進士天性孝友學問淵深任都御史以介直聞晉兵部侍郎引年歸嚴家訓撫孤貧行誼茂著鄉評頌之

楊僕

楊僕南溪人弘治中進士歷刑部主事蚤孤事母以孝聞友愛伯兄甚至母喪畢起復後期忤逆瑾卽引歸居家二十餘年布衣蔬食不履公門祖產悉以讓兄又捐家貲嫁族女之無依者

侯啓忠

侯啓忠長寧人弘治間進士歷江西叅政安化之亂

啓忠倡衆削平精忠勁節播聞中外著涓里文集

李仕清

李仕清長寧人弘治初進士授戶部主事歷陝西叅政廣儲蓄革奸弊決疑獄政績居多及致仕兄弟同爨盡以故產讓其弟建文明書院率鄉族子弟其中親爲講解多以成就

劉景宇

劉景宇南溪人正德中進士任御史因疏薦王守仁不報遂謝病桂萼以書招之不應嘗手書范滂傳揭于庭日夕三復每歲終將諸當道饋遺悉歸有司作

書荅謝

周 惠

周惠宜賓人進士嘉靖初任雲南副使溫厚純謹筮
仕刑曹讞獄明允歷官憲臬政績著聞陳情就養克
敦孝友鄉評推重焉

甘爲霖

甘爲霖富順人嘉靖初進士官至少保工部尚書學
問淵源孝友篤至自治郡陟孤卿公廉自矢權貴莫
撓 太廟建立議度量材盡制省費 世宗甚眷注
末年陳情養母縉紳重其行誼

駱顯

駱顯富順人嘉靖初進士官戶部侍郎時北虜犯京師顯爲守門西山昌平一帶民被殘傷者奉勅賑濟撫綏流移還定居多總督漕運聲稱益隆解歸田宅一仍其舊鄉黨高之

卞偉

卞偉宜賓人嘉靖中任御史巡按陝西獨振風裁豪右斂手擢雲南副使威攝土酋事繼母盡孝年八十而卒

蘇奎章

蘇奎章筠連人岷藩教授博覽羣書潛心理學事父至孝一日與父入山遇虎無所避章倉皇泣告願舍父食已虎併舍之而去人咸稱異督學郭公爲作猛虎歌紀其事

補遺

李人儀

李人儀四川隆昌縣人景泰二年進士除廣東道御史建言下獄以天變得什出襄陽知縣陞荊州府知府卒

劉信

劉信字明節四川南溪縣人成化十一年進士由崇陽知縣選浙江道御史清軍貴州巡按福建陞貴州僉事廣西叅議以征黎賊功賜三品服後復叛戰死事聞賜祭錄其子

重慶府

蹇義

蹇義字宜之重慶府巴縣人。生而岐嶷，長端重，不好弄，而嗜學，弗懈。始從里社師，中書左丞殷哲時爲郡守，一見異之，引充郡學弟子員。語其師曰：「是兒將來遠到，非吾所及，當成就之。」而義不煩程督，日有進益。洪武甲子，中四川鄉試。乙丑，中禮部會試。廷試，賜同進士出身，擢中書舍人，授徵仕郎。見重。太祖每前奏事稱旨，上數見，獎賚。初名瑤，一日遇奏事畢，問汝蹇叔之後乎？義叩頭不敢對。上嘉其篤實，親

灑宸翰書義字賜之以易舊名時丁羅夫人憂賜道里費且命馳驛歸蓋特恩云服闋仍舊職滿三載吏部奏當調特命終九載朝夕左右凡機密文字必以付義而小心敬慎久而愈篤三十一年閏五月建文卽位陞吏部右侍郎授嘉議大夫壬午成祖入正大統同夏原吉等皆被寵眷首言建文中凡中外大小衙門有創革陞降官員額數有增減者及所更改文武散官并考滿等例並合遵復舊制上曰如關軍民利害可因時損益旣於利害無所關涉何用更改俱速改復一日上視朝以建文多改舊制

顧侍臣嘆曰如羣臣散官一事前代沿襲已久何關利害亦欲改易且陵土未乾何忍紛紛爲此於是

天顏愴然變色旣又曰凡開創之主其經歷多謀慮深每作一事必籌度數日乃行亦欲子孫世守之故詩書所載前王之善必曰不愆不忘率由舊章於警戒後世必曰率乃祖攸行曰監於先王成憲此皆老成之言後世輕佻諂諛之徒立心不端以其私智小見導嗣君改易 祖法嗣君不明以爲能而寵任之徇小人之邪謀至於國弊民叛而喪其社稷者有之矣豈可不以爲戒改義左侍郎尋陞吏部尚書時政

令制度有非洪武之舊者 詔悉復之義從容爲上
言鑿成憲者豈無因革反亂政者自有經權損益貴
適時宜間舉數事陳說本末 成祖以義忠實悉從
其言有除官不得善地訴義不公者斥之十二月義
言鹽課提舉司考滿舊無定制宜如稅課司局官三
年赴布政司按察司考覆於九年赴部通考從之永
樂元年七月義言太僕寺太常寺光祿寺通政司大
理寺國子監鴻臚寺翰林院正佐官考滿舊例四品
以上本部不考五品以下未有定擬 上命准四品
以上之例二年冊 仁宗爲皇太子命義兼詹事時

師傅皆以勲臣兼之而輔導責任文臣詹事蓋元僚也 上欲有論 皇太子率諭詹事往導意義亦委曲周悉 皇太子尤愛重義所言靡不信用六月義言諸司歷事監生例應三月後授官近因少闕有一年未授者而內府辦事監生止是謄寫奏本查理文冊稽算數目別無政務廼者內官監奏准半歲授官而歷事監生有政務者反遲今後宜令有司內府辦事監生日日滿日定例給賞仍令回監進學依次歷事出身 上從之七年 車駕巡狩北京命輔 皇太子監國中外庶務惟 諸王及遠夷有奏請詣行

在餘悉啓聞處分義熟於故典達於政體孜孜無倦
不動聲色而事賴以濟數奉命兼理他部事雖職務
填委處之裕如十七年丁父喪歸 上及皇太子皆
遣官 賜祭 皇太子贈賻尤厚有詔起復詣北京
謝 上慰勞再三 賜鈔千緡遣中官護送至南京
十八年 詔定鼎北京從 皇太子朝北京十九年
二殿災遂 命同給事中馬俊巡撫直隸應天等府
州問兵民休戚及文武官吏之賢否而陞黜之義謂
國家多事之際悉以法繩吏人將不勝特黜其太甚
者數人餘多見寬假而兵民利弊當與革者具奏行

之還吏部二十年 上北征還坐東宮事繫錦衣獄
尋釋 仁宗初嗣位一切政議預者四五人而義居
首進少保兼吏部尚書二俸俱支 賜冠服象笏及
玉帶二遂進少傅及進少師 賜師傅之臣銀章各
一其文曰繩愆糾繆義首被賜 上諭之曰朕有過
舉卿卽具疏用此封識進來蓋望義等匡直也繼

賜誥榮祿大夫封贈三代及妻於數人誥詞 上特
增曰勿謂崇高而難入勿以有所從違而或怠又面
諭曰此朕實心蓋所以望義者甚切也又念義等從
侍監國舊勞特製蹇忠貞印賜之義重厚每事不敢

專斷每承顧問常持兩端不決西楊謂勿過思義曰
事不熟慮有後患 上笑曰義士奇言皆是東楊或
詆之語聞 上不直東楊義頓首言榮無他卽左右
有讒榮者願 皇上慎察 上曰吾亦不信偶言及
耳時修 成祖實錄命義監修 宣宗嗣位一切政
議屬義數人如 仁宗之初繼奉命監修 仁宗實
錄書成 賜白金文綺鞍馬宣德元年扈從征漢庶
人高煦還寵賚尤厚七月義言四川按察使陳璉持
憲非其所長改南京通政使掌國子監事 上知璉
有文名謂義曰命官稱其才則不勞而職易舉向所

用非所長矣今其庶幾乎然爲天下師表尤不易也
時議赦交趾義及夏原吉力言 祖宗疆土不可棄
上不聽命擇人使交趾義薦伏伯安楊士奇謂伯安
不可使義當楊前力爭夏原吉亦曰不可而義亦不
以二人爲異已三年復從巡邊旣還以義年老不欲
煩以有司之務 賜勅輟吏部之務朝夕左右相與
討論至理共寧邦家明年夏 賜新第於文明門內
寵祿薦加五年六月義奏舊例國子監官九載考滿
者但復職增俸 上曰國子監官有例復職固是優
待儒者但他官九年俱陞職學官獨不可陞乎令量

加翰林史職仍理教事又若教官中有學術才識出衆者尤當不拘資格拔擢勿謂儒者不可用八年吏部言義歷少師九載降勅褒諭仍賜宴禮部是歲生日賜鈔萬緡廐馬一匹十年英宗嗣位賜白金文綺是夕齋宿於公得疾以聞上遣太監范弘以醫來視賜鈔萬緡明日范太監以衆醫偕來又明日疾革范復來問所欲言對曰陛下初嗣大寶義獨不能效分寸裨益然區區犬馬之誠所望於聖明者惟敬守洪武成憲始終不渝耳言已而絕訃聞上深悼歎屬時有大事停諸祀特賜贈太師謚忠定

義爲人沉深質實和厚簡靜處人無所拂逆至於議
法亦不苟爲包含必歸中正歷事五朝凡五十年所
履坦坦無一日顛躓之憂退朝之暇手不釋卷貴而
能謙富而能約 上前所言未嘗退以語人蓋天下
有陰被其利者矣

劉元

劉元長壽人洪武中任吏部員外奉使過河南見餓
孳盈道遂發倉賑之活人萬數

康健

康健合州人初名子榮洪武中由太學生授給事中

受 太祖眷注改今名敷奏詳明歷官二十餘年冰
霜之操終始不渝

胡子昭

胡子昭字仲常大足人初名志高富經術性方介從
學方孝孺遊漢中蜀獻王重子昭贈子昭詩以明經
儒士薦爲榮縣訓導建文中陞翰林檢討又陞山東
按察僉事進刑部左侍郎建文四年九月死臨刑詩
曰兩間正氣歸泉壤一點丹心在帝鄉時年四十一
父復初母郭氏皆年八十餘并其子五人紹鎮繼等
皆謫戍正德中巡按御史熊相立祠祀之

胡子義

胡子義昭之弟膺辟薦分教威遠歷山東僉事聞兄死節棄官避世隱于丹陵民家蜀獻王知而憐之命剪髮隱于僧子義曰父母遺體不敢毀傷生子二各年數歲子義曰嗟乎吾兄無後天不絕胡氏二子當免于難遂棄去不知所終有懷鄉詩曰一區廢宅棠山下半畝方塘夕照中鄉國匪遙身自遠乾坤雖大足難容

伍善

伍善合州人正統中進士拜御史性剛介不阿權貴

劾中官李寶叛逆總兵石亨擅權左遷卒于官

蹇英

蹇英字伯榮重慶巴縣人太師忠定公冢子仁孝淳謹太師寵冠羣臣名震天下而英日侍側親賢友仁躬躬然如寒家子略不有倨傲態衣服飲食悉從儉約在南京時鄰居伏侍郎之隸卒疽發于背委諸途見而憐之爲求劉御醫治得不死嘗遊句容寓崇明寺寺有中官一僕亦發疽弗治以待斃英延醫士張榮療之而愈永樂甲辰母歿時忠定公扈從鑾輿行在所來請治喪命至高郵湖暴風壞舟舟人失色英

籲天曰英平生不敢爲悖理事是行特請父命治母
喪天如憫之幸貸其死少頃舟漂至中洲而止後扶
柩歸權殯蒲壩廬于殯側時久旱爲文率父老禱於
神時雨大降禾乃登旣免喪 上驛召來侍忠定所
及忠定公薨哀毀踰制尋授尚寶司丞以歸舟次江
表風雨大至俄有覆舟順流而下急遣家僮以艇救
之活男婦七人居繼母喪不異所自出正統戊午服
闋復職己巳扈從北征明年庚午進本司卿一日
朝廷行大婚禮先期禮部失請寶璽之捧及期衆謂
倉卒不可復請英力請捧之以成禮天順己卯進太

常少卿辛巳秋患肺疾劇醫弗效一夕夢神人告曰
勿憂吾爲汝增福壽矣疾果愈上疏請老詔不允甲
申復疏懇請始獲命成化元年春治裝歸次南京疾
復作遂卒於都城年七十四訃聞 上遣官致祭前
後居官凡三十年持身端謹蒞事勞動茂修不懈清
譽彌彰平居喜讀書凡經籍子史及九流百氏靡不
力購所著有草亭集寓懷稿

李實

李實字孟誠號虛菴合州人母夢巨蛇繞身而誕適
五月二十日俗以是日爲龍會因以命其小字狀貌

豐偉曾次高明奮業儒術爲郡庠弟子員博洽瑰奇
爲一時流輩所推正統辛酉領鄉薦明年壬戌第進
士乙丑春擢禮科給事中屢上章疏咸切時弊己巳
秋 英宗北狩留虜庭景泰庚午被 命歷淮揚諸
郡招義兵二萬餘赴都下策應時有豪猾乘機倡亂
爲河道害者嚴禁以法遂帖然五月進本科都給事
中章數上愛者戒以宜少慎默恐賈禍曰吾所任言
官也食祿而曠職恥莫大焉何敢爲身謀也聞者愧
服六月瓦剌脫脫太師也先來議和詔命入京堂上
官有如富弼文天祥者往使莫有應者實曰國家養

士正備緩急之用况主辱臣死義也其可避難毅然請行上悅陞禮部右侍郎充瓦剌正使大理寺少卿羅綺副之具奏八事皆與虜所當議者上覽之

曰事難預度卿至彼隨機應變處之七月一日陞辭面受詔勅賜白金文綺及一品服從一十六人經榆河驛居庸關抵也先營相見以賓主禮責以大義氣壯詞直虜酋悅服具乳酪禮甚恭許奉鑾輿南還次日朝見英宗行在所面定回鑾之計領書辭歸奏換奉迎勅再使往還備嘗艱險英宗還都朝廷嘉其勞績進資善大夫都察院右都御史巡撫湖廣苗

寇爲患以兵勦之岷王謀爲不軌擒送京師除凶暴
安善良恩威並行政化大治五年甲戌詔還掌院事
風裁凜然六年乙亥春母歿守制 英宗復辟忌者
讒之免官家居天順癸未鄉人有訟於朝者逮繫錦
衣衛獄時衛使門達擅權作威福素忌其名且入侯
爵之譖將謀不利一日 英宗坐便殿召達令問實
有何言達覆奏以實云其所言者非臣下所得聞必
面陳乃可 英宗俛首泣下因不豫而入達退而懼
不敢加害後數日 英宗登遐 憲宗嗣統廉知無
辜給還所沒家貲令冠帶閒住甫抵家而父歿將葬

陰雨連旬默禱至葬日開霽既葬復如初人以爲忠
孝所感成化八年壬辰驛詔赴闕沮於言者復職致
仕優游田里幾三十年以山水文籍自娛乙巳年始
卒得年七十有三訃聞遣官造墳布政司論祭恩禮
備至云

江朝宗

江朝宗字東之四川巴縣人景泰二年進士入翰林
爲庶吉士授檢討與修大明一統志陞編修秩滿陞
侍講成化三年與修英廟實錄陞司經局洗馬俄
遷侍讀學士 孝宗在青宮日侍講讀尋坐都御史

牟俸累調廣東市舶提舉司提舉既而累章乞休吏部覆請上以其才學可惜令復原職致仕家居二十年卒朝宗早以文譽歷清秩凡侍經緯供史事典文衡勞勩頗著嘗以起復病于道上特命遣醫治之然性和易不擇交與人亦莫有非之者其卒也乃效白樂天自述壙志以識平生云

劉 岌

劉岌字凌雲四川涪州人景泰甲戌進士授吏部主事遷郎中以憂去服闋改戶部二年仍補文選公清勤慎時論與之累官太常卿禮部尚書掌寺事久典

秩紀陳習儀章且容觀魁傑音吐鴻暢甚爲 憲宗
所眷注進太子少保以疾乞致仕不許岌自陳世爲
戎籍勅兵部除其籍弘治乙酉岌復以老請乃賜馳
驛并寶鏹以還命有司給夫廩家居一十七年而卒
訃聞賜祭葬岌平生謙謹亟稱人之善聞人過失輒
止之或面侮之亦不校初艱于子官京師時妾有生
子者妻妬而棄之道人爲收鞠至八歲乃復迎歸以
爲子聞者以爲岌厚德之報云

蔣雲漢

蔣雲漢字天章重慶巴縣人天順元年舉進士授戶

部主事成化五年陞興化知府丁母憂改大理府十
九年擢貴州左叅政以父憂去弘治元年改廣東未
幾遷福建右布政尋轉左十年上疏乞歸又明年其
子恭自中書舍人轉吏部員外郎勲恩進階正奉大
夫正治卿十八年以徽號恩再進資善大夫蓋優
游林下者十餘年乃卒初在戶部時爲尚書年公富
所知事有難處者必以屬之嘗監收畿內芻粟乾沒
者無所容乃揚言欲狙擊之所親或勸少假借者笑
曰我命在天豈此輩所能害也執不變繼往徐州監
倉夜夢白面大耳冠巾者來見曰我薛公之神也贈

汝劍設有他虞擊之言已忽有鬼物擁隨如其言擊之輒仆既覺莫知所謂明日舟經濟寧下閘爲急湍衝覆見者謂不可救矣頃之手擊舟底聲聞于外人趨救之舟卽自正乃知爲神所祐其在興化政尚寬簡獨馭吏不少縱後治大理亦如之大理徭役故無成法吏緣爲奸貧民病之乃量其貧富爲之等第因以授役輕重乃均春秋丁祭頗用稅稗考訂儀式製祭器又延樂師教諸生肄習乃成禮遇水旱禱輒應所至皆有惠澤及民詳審精密寧其身之不究于用而不欲愧於其心寧在我無赫赫之名而不欲逐逐

於近利廉介之操始終如一大理有鮑指揮者嘗以寶玉首飾置盒中往遺竣拒之鮑跽請曰卽不受盍一啓視乎曰旣不受奚視爲比致仕同官者贐之辭又使人出境強之亦不可曰使可受何必踰境也天性孝友初自大理報政于朝會擬推貴州叅政曰吾父老矣往年吾母沒以官遠道不得親視含殮至今抱恨今得近於吾鄉是吾願也抵任踰年奉表入賀因過家爲壽自京師還又留兩月父乃卒人以爲孝誠所感愛二庶弟尤篤先世所遺田宅器物悉推與之曰某以竊祿可自給也居家訓子弟過嚴及待人

溫厚有容不見人過無事則盡日端坐每讀一書終篇必掩卷默誦務得其所以言之意首尾貫徹乃更讀他書晚年尤喜學易聞其言者各有所得而退

費廣

費廣合州人以進士選御史天順初上疏劾石亨擅權謫知永寧改貴池卒于官廣爲人秀偉嚴重工詩文著約齋集

王愛義

附李典

王愛義永川人天順間有盜標掠村落劫殺人財母羅氏病臥寢室愛義侍不忍去賊入索財不得母子

俱死李興永川人讀書能識姓名而志行絕特嘗拾金釵訪主還之買一豕人以爲過所直而喜興乃候於市數日得賣主邀與同歸復償足之一日晨啓後條歸傷其額妻詢之對曰隣婦竊吾園蔬恐其見已無以容也故條歸傷額爾其他重厚事多類此

劉春

劉春字仁仲號東川一號樛菴巴縣人成化癸卯舉四川鄉試第一丁未舉進士廷對第二授翰林編修孝宗御極克修憲宗實錄官實錄成陞修撰仍賜宴於中府選克經筵展書官癸丑克殿試

掌卷官四月賜端陽節物自是歲以爲常七月疏乞
歸省給道里費復任己未充會試同考官選充東
宮講讀三考滿陞左春坊左諭德癸亥以纂修大明
會典成陞翰林院侍讀學士五月 詔選修通鑑纂
要甲子以父母偕七十再乞歸省 命給驛行且賜
道里費乙丑冬還朝 武宗御極陞學士 詔纂修
孝廟實錄 上念青宮舊勞 特賜金鑲玳瑁帶一
又賜 御製盤龍廻文十二軸丁卯四月 命掌院
事武舉充試官武舉有錄自此始其條格皆創爲之
丁外艱歸服滿陞吏部右侍郎轉左克 經筵日講

官以河北平盜建議功 賜文綺鍤金陞禮部尚書
丁內艱歸以 經筵日講 東宮講讀勞 賜祭葬
遣禮部經紀其事仍給驛以行服除改南京吏部尚
書疏辭不允仍蔭第三子延年國子監讀書五月命
掌詹事府事 廷試爲讀卷官以六月不起春在翰
林每以職在論思手不釋卷坐必夜分起必五鼓如
未第時凡舉動皆爲遠久計不務目前西僧有欲奪
民地於甘州且乞遣官督建寺時關中實饑春力爭
以爲不可謂非止病民邊警亦必致擾疏入起停之
宗藩請封及婚嫁弊孔百出春卽檢其行駁者盡語

之吏不得欺以求賄又以祭葬謚議關係勸懲乃奏
爲定格有以厚利力請者不爲動久之亦安其所宜
得心莫之怨也故事功臣襲爵表謝皆禮部代譔謝
以銀幣悉却之其峻于操介如此春忠清嚴重毫髮
不苟門無雜賓待物寬簡雖未見其矯矯之節而光
明俊偉不可奪志以憂歸逆瑾遣邏卒伺于道卒無
所得而還待物和而有則人不見喜怒至正義所在
毅然爭之不能奪也每語後進拳拳不欲失秀才風
味見不可意事輒頻頤曰士大夫存心行事何必乃
爾詩文力追古作晚益簡勁類其人碑板在四方者

甚衆有鳳山稿數卷藏于家贈太子太保謚文簡

朱光正

朱光正大足人成化中由舉人知河西剛明廉謹得
吏民心交阯侵邊光正喻以大義夷退當道書談笑
却兵旌之

鄒智

鄒智字汝愚合州人成化二十三年進士生而穎敏
過人年十二能文章經史一目卽不忘嘗居龍泉菴
貧燒樹葉讀書達旦如是三年文思警拔千言立就
改庶吉士翰林會星變應詔陳言極論陰陽之理言

少師萬安恃祿保寵殊無厭足少保劉吉附下罔上
漫無可否太子少保尹直挾詐懷奸全無廉耻世所
謂小人也南京兵部尚書致仕王恕託志忠勤可任
大事兵部尚書王竑秉節剛勁可寢大奸直隸巡撫
右副都御史彭韶學識純正可決大疑世所謂君子
也乞盡斥小人而進用君子疏入不報弘治三年御
史湯鼐劾萬劉尹萬尹去而劉得留恨鼐御史魏璋
附劉劉啖璋能去鼐陞僉都御史璋卽草疏署陳景
隆等名劾鼐與壽州知州劉槃妄言朝政嫉之者因
下詔獄身親三木僅餘殘喘神色自若無所曲撓獄

官苦訐之曰智與今湯鼎等來往或論 經筵不宜
撤講或論午朝不宜以一事塞責或論紀綱廢弛或
論風俗浮沉或論生民憔悴邊境空虛當事者恨甚
竟坐以妖言惑衆律罪死刑部侍郎彭韶辭不判徐
文靖亦言吾輩不可使 朝廷有殺諫臣名獲免左
遷廣東石城所吏目旣謫毅然就道衣結履穿幾不
能存親識餽遺堅却不受至石城視事甫兩月廢政
悉舉總督都御史秦紘檄董修書得居廣城與白沙
友善暴疾卒年二十六獄中詩人到白頭終是盡事
垂青史定誰真夢中不識身猶繫又逐東風入紫宸

進朝詩盡披肝膽知何日望見衣裳只此時但願
聖朝無一事孤臣萬死更何悲忠義之概情見乎詞
矣

湯孟瑛

楊孟瑛字溫甫鄞都縣人成化丁未進士弘治十五
年知杭州遷順天府丞瑛當事敢任如奏安溪竹木
關却福建進貢之借艘于杭減免旱災糧七萬石定
水馬驛夫之徵皆便民美政其浚復西湖俾水有蓄
洩實利益下塘諸田而論者或謂其歛怨生謗此其
故不可詳究要之爲敏幹吏云

陳瑞

陳瑞忠州人弘治初以進士拜給事中疏劾中官郭鋪諛媚乞罷內侍官不得叅機務上嘉納之陞光祿卿請禁浮屠罷國醮及減奢費等事歸省道卒聞者惜之

劉福

劉福字順夫巴縣人弘治九年陞浙江按察使風儀峻整法紀森嚴部內憚其威名不寒而慄後以註誤改貴州按察使盤江賊起福挺身赴之遂死于賊

詹奎

詹奎巴縣人弘治中進士爲戶部郎劾權奸掛冠歸後以徵復起歷官十餘年家貧如故

曹勅

曹勅巴縣人弘治進士官刑部員外郎治獄無冤使晉藩餽遺無所受好古力學爲時所推重云

姚學禮

姚學禮巴縣人弘治中進士歷叅議性忠侃初居南臺以敢言忤逆瑾罷歸其志節有足嘉者

戴錦

戴錦長壽人弘治中進士抗疏請除壅蔽權貴忌之

中傷落職貧不能歸流寓徐淮間授徒自給久之乃歸著網菴諸集行于世

劉蒞

劉蒞涪州人正德初任給事中中官瑾擅權首抗疏極言其奸被笞落職瑾敗起守金華尋歸

胡守約

胡守約合州人正德初以鄉薦授彭蠡知縣遇寇攻城親出督戰身被數鎗遇異人療之不死歷官知府

王俊民

王俊民合州人正德中以進士歷給事中蹇諤有聲

中官畏憚以直言忤 旨死于廷杖

劉鶴年

劉鶴年巴縣人正德進士操守廉峻持已剛方始任兵曹門無私謁歷雲南布政不持一錢時稱清白吏

張 縉

張縉字元素四川巴縣人正德戊辰進士己卯按浙性持重不事苛細而綜理詳慎風紀克張江藩逆濠蓄謀不軌預置心腹畢真爲浙鎮守威蒞羣屬恩結士卒潛圖策應縉知狀佯示款好乃深慮而密防之練兵儲粟以備不虞六月報聞濠于十四日戕殺撫

臣稱兵犯順杭城戒嚴七月十四日晡刻鎮守傳令
三司期來日四鼓下操衆訝之疑其爲變縉定計以
是日出表比禮竟則天已大曙謀不得行復與郡守
留志淑議先伏兵真府外諸司盡入遂脅真使去諸
左右復盡得府中藏甲咸以屬吏真懼不知所爲不
踰月江右平後論治逆黨遂按誅真初逆謀始露時
人心洶洶賴庶尹同心奸謀遂寢卒奠安兩浙者本
縉與藩臬諸人之力也縉後位至副都御史祀名宦

熊萬變

熊萬變榮昌縣庠生正德中流賊圍其居舉家舍皇

母尚未行萬變告其兄曰母被圍我輩脫出何爲相
與還赴難擊殺二賊負母逃爲賊所執被殺母伏於
屍罵賊亦被殺

任 轍

任轍巴縣人嘉靖初進士知許州歲旱多方賑恤擢
守黃州採木之役善爲調停民困以蘇歷官貴州都
御史計縛叛夷許吳等邊陲賴以奠安

劉啓宗

劉啓宗巴縣人嘉靖中進士任衢州府推官選給事
中抗言不避權貴謫荔蒲尉歷陞提學副使改苑馬

卿居官二十餘年持廉守正卓有風裁

張佳胤

張佳胤字肖甫重慶銅梁人初號壚山以其家在居來兩山間更之曰居來山人十七爲制舉義試輒冠諸生時重慶太守光州劉公出行部閱其文而大奇之使與其子游卽玄子也劉公固以古文名家又好談兵多奇文凡所携書籍盡以屬之間與玄子談當世英雄而歎曰夫英雄者其吾家子房乎玄子異其志而又益習先秦西京言下上于黃初大曆之間多所厭阻二十三舉於蜀明年遂成進士出補大名之

滑令故三輔巖邑也比至按宿牘讞決若神而恒以情衷法而行之兩造甫畢各得意而去吏民之嚴愛若父母矣時緹帥挾上寵張甚其所遣詞事官校與詔旨竝重佳胤一日晏坐有弁而急裝者一髯輔之至邑門門者戟之叱曰我官校也遂入下與語徑前曰縣官欲捕若邑耿氏豪亦與若有連胥吏以下皆辟易遂挾之入別室出七首交置於項曰予我萬金陽驚曰我何所得萬金髯者曰某庫有萬金復陽驚曰庫金誠有之第上皆邑賦長名氏若出十里外必敗且今日予公庫金法必死不予亦死死等耳寧

死國引其項曰七首胡不下髯者曰我何忍下第欲
得金耳乃徐謂曰邑郭中多富人我出一紙授之卽
不得萬金可半致也呼一小吏前命筆書紙應賦金
者二十曹曰緹帥責金甚急可人賦致二百金來予
之時丞簿跼躄儀門外旣得所賦金主名乃皆賊曹
游徼驍武者也始知爲劫賊亟集此二十人者人奉
二十金而袖鐵椎前謁謂民貧所賦金止此矣乃陽
怒曰賦汝人二百金胡二十也何以解二公索復令
一人前忽躍而就之髯者出不意卽自剄死羣縛并
者訊之名任敬髯者高章也使游徼四跡郊外有四

輕騎皆逸去拷問皆得其人磔于市居邑多暇乃喜
爲歌詩而李于鱗守順德爲比壤出其詩爲贄于鱗
大善之與拆節講鈞禮時歲大饑而富民有故塞糴
者請於臺平價納諸倉爲粥以食饑者所全活數萬
計事聞特賜金幣治理流聞法當首垣省以年未及
格擢戶部主事旣入遂與諸君子稭文翩翩相砥礪
且飛觴染翰卜夜無已亡何出權閩廣金帛洗手出
入毫髮無所私道改兵部職方主事累遷都察院右
僉都御史提督應天等處軍務兼巡撫所行諸郡縣
務持大體不屑屑期會務以民瘼吏弊爲急已而中

蜚語聽調歸未幾補南京鴻臚寺卿屢遷巡撫宣府
爲宣府未幾而虜別部長滿五擁鐵騎六百闌入獨
石口剽掠時久已通互市矣因檄大帥麻錦伏兵邀
之生獲其副八賴滿五懇求之辭甚哀計以縱之則
見狎僂之則見讐乃以屬大帥錦俾建旗鼓縛八賴
將斬而馳赦之八賴叩頭流血曰微太師身首異處
矣乃諭以威德給之銀符八賴自誓不敢復闌入邊
然八賴擾而滿五驕明年挾益賞不聽互市如舊事
聞勞賜金帛入爲兵部右侍郎未幾而浙江有驕卒
之警督撫浙者吳中丞善言嘗取 中旨減卒月餉

卒訴之不聽遂噪而縛吳公車中冠履俱破至演武
塲羣詈吳公而數之且甘心焉會工部郎謙與二御
史往解詬詈百端猶責吳公狀使復餉而以二千金
謝過乃已吳公遂出遜於吳興當此之時吳楚閩越
之卒皆驕而督撫臣悸至有穴垣以防不測者事聞
江陵公曰孰能制之旣而謂吾得人矣遂以佳胤兼
右僉都御史奉命往及馳至甫與吳公代而市民之
亂復起始杭城中諸柵俱有役夫司干楸諸土著者
募游手充之其後必取身役其人每多借貴勢以免
夫數益以狹役益迫而游手無所得食僑客丁仕卿

假利便言之監司弗聽意忿忿曰謂我曹無瓜距耶
寧營卒之不若謀之市猾相率焚貴勢家謂庇其應
役者遂破兩臺使門略其衣裝以出使者跳與三司
俱匿跡佛廬以免事聞佳胤謂其人曰營兵哨海者
發乎曰發矣而二營留問留者不與市民合耶曰未
也喜曰吾知所以處矣速驅之從吏惴惴無人色飲
食談笑自若既抵鎮而民行剽愈甚盡毀諸柵以快
意千餘人且抵臺門佳胤以輕輿出諭之曰汝曹必
有所苦曰苦夜役耳夫強有力之家倚貴勢之家以
免而監司守令若弗聞也者曰易耳卽下令除役衆

姑叩首退既退而行剽巨室竟夜火光亘天大怒曰
上命我誅亂卒今乃見亂民而靡耶召遊擊將軍徐
景星使呼二營之長入而慰免之曰亂民之惡極矣
雖然非爾曹勿能剪也何不因以爲功贖曩罪乎咸
踊躍聽命又呼黥卒之首倡亂者馬文英劉廷用曰
聞汝二人前自縛請死壯士也汝死法胡不死義且
必不死二人亦踊躍聽命于是約束二營壯士使景
星帥而討亂民凡四戰大敗之生獲百五十人至轅
門而丁仕卿與焉擇其豪得五十人皆斬首梟轅門
餘悉下獄其從亂者咸惕伏或鳥獸散去杭人若更

生 上優詔褒答以奮身犯難定變俄頃紀綱大振
忠績卓異賜飛魚服鎰金文綺私念兵且戢矣寬之
則廢法急之則生變乃陽好謂二倡亂者馬文英劉
廷用曰罪可贖矣予之冠帶二人意自得洋洋羣卒
間且有所侵侮羣卒大怨恨謂若倡我以亂自爲功
得官而使我曹尚惴惴也度是二渠者與衆心左無
能爲矣乃謀發諸營之卒哨於海而密以名屬徐將
軍下令縛之至軍門并文英廷用輩皆斬之餘皆赦
弗治仍呼平亂者二營卒語之曰吾非不得若主名
以昔有微勛耳且吾不欲食言羣卒咸股弁唯唯

上大悅拜都察院右都御史兼兵部左侍郎俾還部
理左侍郎事道拜兵部尚書協理京管戎政尋又總
督薊遼三邊以遼左大捷加太子少保已陞兵部尚
書三上書乞骸歸有張居來先生集行于世

江淵

江淵江津人由進士歷學士工部尚書清勤簡靜忠
鯁不阿尤善文詞著觀光錦榮諸集

王應元

王應元武隆人家貧居鄉力農爲養父友文每出飲
元候于途扶之以歸一日文醉旣卧元往于出家偶

火災急奔回烈焰甚熾身濡泥水出而復入救之者
三號哭火中抱父死

聶賢

聶賢長壽縣人以大獄事革職尋起爲工部尚書尋
致仕卒詔賜祭葬如例贈太子太保謚榮襄賢持正
守清苦始終不變士論重之

李允

李允忠州人進士歷翰林檢討正朝儀年四十辭歸
閉門讀書流賊過其門咸相戒曰勿犯李翰林其感
人如此鄉黨咸重之

白勉

白勉涪州人以進士歷官刑部侍郎練達刑名有匡濟才及卒賜諭祭有剛方清介之語鄉人榮之

沈運

沈運重慶衛指揮充右叅將守威茂蠻叛殺人運密置兵門內呼蠻至犒以酒食因并其黨殲之

補遺

尹鉉

尹鉉字太和四川巴縣人正統七年進士除湖廣道御史護駕北征死于土木之難

曾 嶼

曾嶼重慶府人生而奇穎殊凡兒稍長卽以正學自任十四歲補博士弟子每試輒高等郡侯爲築別業于鳳儀山居之正德丁卯舉省試明年成進士授戶部江西司主事時逆瑾爲政縉紳趨者如市嶼間以言觸之會瑾怒矯令跪午門外尋權稅清源以廉明稱後轉員外郎中條上大司徒八事丙子知府建昌益脩循良之業上劑益藩下悉民隱立社學建書院群弟子而考德問業郡有兩芙蓉山多淫祠妖術橫行廉得其首付諸理毀淫祠以祀伍大夫李旰江岳

武穆會寧庶人謀不軌要脅諸司變起遣健卒間道走上變又自帥兵兼程詣軍門陳擒勦七策王文成采之合兵火攻又慮九江南康業已從逆不分道擊之則援兵爲梗文成檄嶼取南康斬賊首謝天一等四百八十餘級又自王家渡同廣信守周朝佐斬獲賊三百三十餘級釋脅從者八十五人寧庶人遂擒當勤王時與母鄧恭人未訣誓與賊不共天卒能成功王文成亦叙其勞烈而竟不錄先是寧庶人膏腴苑囿屋廬多爲豪所侵中丞鄭某檄嶼廉察之一無所徇盡返之官旰郡有巨室欲齟齬麻姑山嶼裁以

法又上叛逆疏內有省內奸邪顯附陰結語繇此忌
與怨交集咸爲蜚語中之遂休致以歸移居江陽郡
城購茅齋數楹藏書數萬卷日坐其中手一編以著
述自快享年八十有二而卒

李恭懿

李恭懿重慶府銅梁人生平究意圖學務在自得聖
賢之旨一切糟粕筌蹄僅資涉獵非所嗜也嘉靖戊
申貢入太學餘姚李司成大器之應順天鄉試下第
謁選授江西奉新縣縣丞一不得志遂罷政歸日掃
榻讀書每好深沉之思而尤精于易理嘗問曰六十

四卦始于何時或曰文王重之曰非也觀繫辭取諸
渙隨等卦則三皇堯舜時事書言龜筮協從則唐虞
時事六十四卦上古已然矣又曰伏羲八卦非盡取
於河圖觀繫辭言仰觀象于天諸句亦自可見又曰
先天南乾北坤後天何不代之長男女而南離北坎
耶此大道之玄老易所同又曰古人釋經不敢自信
故傳不與經相叅小象原自爲類試讀之無不叶韻
至後儒始分經傳故宋人余琰集說不爲無見若使
易無序卦傳不知後人將六十四卦顛鑿何狀矣又
曰原始反終故知死生之說與無極而太極同一意

無極云者從前推後原始云者由後邇前又曰讀乾之彖見文王興周之德讀坤之彖見文王事殷之心聽其言者輒聳然悟以爲今之儒者莫之先也

凌伯魯

凌伯魯號森墨四川永川縣人萬曆甲辰進士因念祖母年高懇疏終養未幾丁艱服闋授南戶部主事陞員外尋陞郎中管應天倉能以搜夙弊爲留都重甲寅陞寶慶知府以持正執法之故與同官相左卽請告歸歸未數年而卒伯魯生平素矜名節交游辭受毫無所苟于理學諸書亦多所探討蓋翩翩不與

流俗伍者惜其賫志以沒耳